

四庫全書

集部

欽定四庫全書

至正集卷五十二

元 許有壬 撰

碑志

故通奉大夫湖廣等處行中書省叅知政事鄭公

神道碑銘

并序

天歷二年己巳九月二十七日湖廣省叅知政事鄭公  
薨於位歸葬有期其子濤狀其行泣請曰先公子之所

知也幸哀而銘諸碑公諱昂霄字顯卿其先由滎陽徙  
澤州陽城曾祖諱珪祖諱皋金季亂能扞鄉里為忠昌  
軍節使贈嘉議大夫晉寧路總管上輕車都尉高平郡  
侯祖妣劉氏高平郡夫人三子曰鼎征大理平江南有  
功累官鎮國上將軍湖北道宣慰使領平陽太原萬戶  
鎮鄂討黃州叛戰沒贈宣忠保節功臣金紫光祿大夫  
平章政事柱國潞國公諡忠肅曰庭瑞信武將軍平陽  
太原萬戶其季公之父諱甫讀書勵節披荊棘為田廬

從忠肅公征蜀有功擢尹陽城十年移夏縣長子潞城  
平棘改倅潞州所至有惠政進知邠州卒贈中奉大夫  
廣東道宣慰使都元帥護軍高平郡公妣宋氏路氏皆  
高平郡夫人二子公其長也初忠肅公之薨也子忠宣  
公制宜襲萬戶陞樞密判至副使以叔父信武老擇稱  
者以公襲公由宿衛出鎮一軍肅然大德間順元土官  
宋隆濟糾折節阿女嘯諸蠻阻險弄兵樞府檄公從分  
省進擊首破關柵日有俘戮因擢於賊所過必掃蕩而

後已雲南四川約兵未至他將分地應接賊乘隙紛出  
公悉敗之總田萬戶突進始通道與約兵會五年冬出  
師七年春賊平公之功居多入朝賜銀鈔金段弓矢以  
明威將軍進懷遠大將軍延祐元年覃定遠大將軍三  
年分戍廣西捐財賞功身冒矢石平靜江二十四寨斬  
其首梁君政擢中奉大夫廣西兩江道宣慰使都元帥  
右江岑世興侵掠州縣招撫寧救復其所侵泰定二年  
復萬戶職廣西徭賊大作詔左丞竒珠及公督師賜繡

段甲仗給傳符分進焚巢獲醜有旨原悔罪者躬入險諭德意降洞寨八十五徭二百五十二戶男女八百五十器械數百陷賊者歸其親天曆元年拜湖廣省叅知政事部平陽保定兩軍屯河側子濤襲萬戶改行樞密副使戰於偃師西兵罷入朝賜銀鈔辭不受明年二月復湖廣叅政賜鞍段甲仗征蜀四月抵播州石虎開蜀道通六月歸以疾辭朝議重其去不允而疾竟不起年纔六十兩娶郭氏皆高平郡夫人公器量雄偉讀書下

士兵興動肆焚劫公所過如無兵長萬夫餘三十年勲名日著忠昌之精至公始疏郡封忠宣之明可知已我元建行省為大藩湖廣控滇蜀山海阻深猺獠之所蟠穴邊報沓至獨以兵稱戍將視他省為多而藉甚在人者獨公為稱首故其薨也士民卒伍無不悲之夫人清婦范氏皆以慟絕家人倉卒但爭救母子得甦而范氏卒不救清奉柩歸以年月日祔陽城先塋而戍將法不聽去清泣欲棄官甘沒齒擯斥乃得請家無贏餘麾下

致賻一無所受亦能子矣銘曰

滎陽導慶至於陽城人代有聞為邦之楨忠昌啟家里  
閑以寧有閑必先王樹挺生惟我有臣忠肅忠宣弛肩  
豐扛伊稱斯傳大江滔滔百折必東彼流有濫寔原之  
逢惟柔能剛匪學莫武入而詩書出而干櫓魑魅穴空  
台衡虛席天乎不辰俛仰今昔嗟嗟孝婦一慟長辭義  
訓有柔茲焉益知承家得賢公其不朽佳城豐碑與世  
永久



故征南千戶蕭公神道碑銘 并序

吾鄉雄厚甲河北慷慨忠義之士宜生其間宋金三四  
百年以迄我朝人代不乏竊思掇拾備太史採錄而四  
方奔走未遑也泰定丁卯內丘尹舒穆魯哈喇布哈奉  
譜狀踰請曰吾家五世居相有功鄉里遺山之碑具焉  
惟是大父征南公年少勇戰以歿暨我祖妣孝節夫人  
遭家中微力振復起若忠若節約不可誣宰木蒼蒼麗  
牲之碑未刻無以稱先美寵後昆敢請里仁考信可不

諾而銘之叙曰公諱世昌字榮甫系出遼右族舒魯氏後  
賜姓蕭至金更姓舒穆魯氏居納新至阿薩爾為郡牧使  
金正隆間子孫移戍清平又為清平人郡牧生扎拉爾贈  
正國上將軍正騎都尉河南縣開國子子闕

巴都本

贈輔國上將軍輕車都尉河南縣開國伯公高祖也曾祖  
托色埒奉國上將軍護軍河南郡開國侯祖德亨字仲通  
以小字哈準行我元弔伐之初隸行將太師承制拜館陶  
招撫使取磁州未嘗戮一人河南得鹿邑太康生口五

千餘人悉縱遣之復彰德有功遷奉國上將軍彰德路  
總管兼行軍總帥府事用是得贈三世因占籍彰德焉  
考珪佩金符征南千戶配耶律氏公七歲而孤容止端  
重不類童子能自力學始學對屬即自知聲律九歲主  
鄂囉十三襲千戶佩符征南儀質雄偉如成人己未扈  
從渡江中統建元以舊職易新命三年從討李璫七旬  
不解甲復宿蘄皆有功至元六年春取五河口手馘四  
十餘人鉤兵及賊反曳以去拔劍斷其臂搏戰舟中血

流沒履得戰艦二資械無筭今血履故在統軍上其功未報七年正月十七日卒於軍年二十有五夫人段氏

闕

千戶高奴女嚴魯王甥年十五嫁征戍悲從

二十三居娶一子恒始七歲謙二歲挈孤扶櫬歸葬安

陽建善村新塋遂屏絕華飾始終一節事姑盡孝教恒

輩學雖長有小過不少恕孫哈喇布哈五歲母亡躬自拊育

宗族貧者周給恐後身自儉約與家人同一門三百口

肅如也至元二十二年中書以孝節旌其門大德十一

年三月二十四日卒享年六十祔征南墓恒亦年十三襲公舊部征交趾戍邊徼以疾歸封武略將軍飛騎尉臨漳縣男謙精國語由河南省蒙古史除承事郎河南省管勾奉發架閣庫擢承務郎杭州路仁和縣尹未上卒孫男六人曰處義襲父職曰處禮處智處信處約皆恒子哈喇布哈謙子也一名處仁起家宥府行人監修國史蒙古史除從事郎益都路嶧州判官河南省蒙古史擢承務郎順德府內邱縣尹有惠政女九人皆適名族魯

孫男六人女五人皆幼於戲征南忠義之氣發於戰陳  
天不引年而止於斯使極其用所就可勝言哉夫人以  
節完忠舉舒穆魯氏之已墜享有丕祉延畀子孫豈非  
天將侈其流而先嗇其源耶銘曰

舒嚕諸孫歷變再微有興子相度乃釋機鞬橐啟行風  
雲際時獮難方狃我戈弗揮係累載途解縲縱歸後承  
惟肖淵淳以施秋隼脫鞬天馬去羈五河晝暝捷書夜  
飛焯勤孔昭玉山遠顏孤嫠哀哀馬革在轡九源既安

一節不移孰堅可磷孰大可宜韓山差我洹水逶迤永  
祀益昌式此弘辭

五龍廟碑

龍於天地間為物最神乾首六十四卦獨是取象其以  
神變不測時乘御天雲行雨施烝民乃粒功莫與京乎  
大塞堪輿小為蠶蠋能短能長能幽能明者神之謂也  
管子曰龍水之神者也乘水則神立則雖神物其亦擇  
所可依而後能神其神哉江河湖海固其家也天下之

曰潭曰湫曰巖曰洞曰池者非一必皆幽深僻險有水可依而後居焉土人往往時見光怪不敢褻也而又旱暵有禱則從而祠焉彰德路安陽縣西北五里洹水之陽有五龍廟廟之下水黑而深洹水至是瀦而後泄其龍居之淵乎太原元裕之效虞初書言明昌中風拔廟樹地印有跡事頗涉怪而不及廟之建始何時其號五者具五方為象設爾以其禱之屢孚也路達嚕噶齊荀公凱零同知阿拉克判官穆爾沁嘗修其廢臺其前至



元四年戊寅夏旱甚甬事請禱六月二十日甲申總管杜公德遠始下車憂惶無措曰不才之來丁旱之會又數日不雨則苗盡槁人何食賦何徵責何以追盍走靈祠而禱諸荀公曰五龍廟效靈自昔協恭精禱神其憫乎於是率僚屬齋沐具香幣禱焉戊子行事雲俄起是夕微雨越翼日大作三日乃止苗之槁者淳然而興市之閉遏者發人之轉徙者息病者以蘇訛言以寂豐凶笑顰變乎旦夕既報祀安陽縣尹趙君時敏請刻石以

昭神貺以遠邦君之休夫龍與人異處昔鬬涓淵子產  
以為吾無求於龍龍亦無求於我惟其無求則子產之  
言是已為天牧以守其土以養其民以供其貢賦而歲  
將告饑人將轉死苟可弭菑當即致其拯則其能無求  
於龍乎且龍之托於茲水以神其神人象而相之有年  
矣應捷桴鼓亦其宜也否則將不與搏土縛芻等哉抑  
聞之雨由乎神而亦由乎人至誠貫金石信及豚魚况  
龍之神人之誠有不格者乎然而龍之德不可忘也祭

法曰山林川谷丘陵能出雲為風雨見怪物皆曰神洹  
水有龍龍能出雲為雨祠亦宜哉書其概申以迎送神  
曲俾祀而歌焉其詞曰

洹之水兮泚泚祠其渙兮惟其潔羗自珍兮神龍沕擇  
勝兮實所宮魑之虐兮蘊隆龜吾田兮槁吾稂穰將竭  
澤兮及爾躬哀吾氓兮疲瘵忍及喙兮弗充龍之怒兮  
奮飛豐隆前驅兮屏繁後隨騰清波兮淋漓沛為霖兮  
鮮厥姜報祀兮孔時冷風肅兮滿旗鼓坎坎兮吹參差

荷神嘉兮無期

闕

膏澤施兮不屯苗其傑兮木欣欣牲之脂兮醪之醇琮  
席覲深兮縈燎薰享不儀物兮享以人龍之去兮逡巡  
噓雲氣兮氤氲歸九淵兮深藏歟大惠兮比一方時潛  
飛兮則其常有扣斯應兮惟爾之臧百穀充羨兮遺秉  
在田龍兮龍兮人不爾諼

故中順大夫同知潭州路總管府事致仕趙公墓  
志銘

先生篤義里閭遇不識亦為具況久敬者乎大德間衡州有滯獄司憲移醴陵知州趙公往按始決公里閭前輩也先公時佐衡幕挈有壬進拜問所業且命賦詩偶不辱教公後休致終於臨川子彝敬勤著聞先公以子妻之公殯二十餘年彝慮先塋之或不治子孫之遂楚也慨然動營丘反周之念啟公之殯以某年缺月缺日祔先塋奉集賢侍讀學士李公倜撰次行實屬銘有壬有壬惟里閭世契重之以婚姻義不可辭乃擷其狀

而銘之公諱良輔字良卿彰德安陽人祖諱浩國初為  
郡經歷能制主帥濫殺有佛子稱妣徐氏考諱謙河南  
統軍司照磨贈中順大夫漢陽知府上騎都尉安陽郡  
伯妣段氏追封安陽郡君皆葬安陽孤莊公弱冠入京  
當途薦為四川屯田令至甫閱月念太夫人遠即棄歸  
御史大夫相威公行臺揚州選為掾及格除淮東道按  
察司經歷外舅王公好禮為使法當避改鎮江路金壇  
縣尹有刼制官吏短長忌子十餘人揭其名於市諭以

禍福皆不敢犯嘗賢勞歸係囚盈獄時寒食因悉縱使  
歸拜掃約三日來無一人逸者告饑於郡遇大風舟幾  
覆公端坐曰吾為民死不恤也風俄止得米三千石以  
歸闕草萊為沃壤民用康裕朝廷以公五事告布天下  
俄太夫人卒哀毀盡禮服除擢平江路推官平江獄訟  
素劇夜則露香顙天晝謝賓客驗誤閱實簡牘直郡百  
五等之枉七十五人明張元之非故殺甲刺乙之不得  
已皆獲免死時朱張二家豪震中外其徒周千戶王殺

沈昌妻奴三人官莫能制公督捕竟寘於法陞新喻知  
州民有犯惡逆者州僚懼罪莫發公時行部聞之曰吾  
承宣不稱罪輕蔽元惡罪重亟歸執問具伏斃之獄中  
有母訴其子者徇於市令母往視杖其子立母於庭戒  
五百諷之曰今杖子必死子死爾何歸盍一訴官或矜  
焉母果流涕懇請公初不許久乃呼子語曰吾欲死爾  
哀爾母請貸爾餘杖當改過終養母子感謝而歸或問  
公公曰盡法子必讎母又不可以言化吾但啟之使母



動哀子之誠子知感母之德彼亦人也能不格哉聞者  
歎服為醴陵知州時有事西南夷轉餉於播道殫相望  
富室坐凋敝爭賂免行公按籍發丁壯吏不能舞其智  
暑途肩運十不至乃潛人走播得其實直集編戶挾  
貲就糴以輸民大便之承檄正他郡賊吏八十五人遷  
撫州路治中值大饑勸分得數萬石末為建昌路同知  
益勵精不怠風紀之薦無慮數十上方六十九請老加  
中順大夫同知潭州路總管府事致仕公生丁未二月


某日終以延佑戊午正月甲戌春秋七十有二初娶李氏早卒繼王氏又卒皆無子繼周氏封安陽郡君至順三年正月甲子某日卒今從祔子七人登彝璉鼎璋琮璧登早卒彝璉琮璧周所出也彝初娶李氏集賢女早卒生子洙繼娶有壬妹巽真又卒生子汾今娶王氏女三人公為人樂易世產悉推與昆弟俸入之餘時給族黨賓客過從必治具盡懽疾革戒諸子曰吾平生不知殖貨無以遺汝汝能自立是吾有以遺汝矣歛葬若祭

視家有無勿用緇黃俾書而手署之以付周夫人命酒  
獻酬無異平時久乃嗒然而逝嗚呼達矣哉有壬求公  
之故而竊有感焉士一命行志崇卑不計也他尚何別  
哉近制仕州縣有績則擢風紀蓋州縣治民者也風紀  
治官者也重輕既殊地亦不能無別焉今仕者必入風  
紀始名為才至于調求之求而得君子不貴也公自始  
建行臺為名郎歷外郡皆著績宜握糾繩之權而薦章  
數十上竟不報公亦恬不為意仕宦四十年而致仕止

四品天之靳公若是哉然而居治民之地行治官之事  
雖不為猶為也顧為而不能行者獨無愧於公乎曩由  
世賞而為臨川丞掾行省歷翰林編修官撫州路推官  
江西行省都事諸子仕皆有途公遺署不忝矣銘曰

昔奠南紀分臬維揚濟濟乃僚靡遠弗翔胡畀一邑俾  
廷而鏗赭衣壘壘遇以此誠縱使悉歸省乃樹封公不  
忍而而能負公人飫於饑土豐於荒焯其緯績播之四  
方無屈不伸無幽不明世知其恕不知其平母不予隱

子不母從惟因爾天以觸爾衷茲惟愷悌起黃邁龔治  
勢以緩御煩以清死生之際不渝故常浮雲富貴視之  
宜輕山川雄渾實惟故鄉善人輩出匪私匪同太行之  
左洹水之陽壘其百支茲公之藏



至正集卷五十二

欽定四庫全書

集部

至正集卷五十三至

六

詳校官編修臣錢樾

侍讀臣孫球覆勘

總校官降調編修臣倉聖脉

校對官中書臣潘曾起

膳錄監生臣王天侶

欽定四庫全書

至正集卷五十三

元 許有壬 撰

碑志

西域使者哈北哈津碑

至大己酉始建中都設留司苟公溫都爾為都事有壬  
為教官乙卯計偕又與其弟凱霖同旅次京師後屢合  
輒道故舊懽甚凱霖以交其兄弟之久知其踐履之悉

也走狀京師請銘其祖考西使公碑夫聞善而與之君子之心也況交其子孫而銘其父祖乎公諱哈扎哈津諤爾根氏世西域人國去天朝遠而險非誠慤不可至公凡兩至又與其舅鎮阿薩爾渡太祖皇帝兵壓境公斷渡修壘堅守持久衆怨公不降懼破則殘獮公嘆曰廢興有天我非不知但臣子分當爾也衆益瀕洞將內變遂降上按劍問抗師狀先斷其髮將誅之正色對曰臣各為其主非罪也死不過汙一席地何恨但恐無名



爾上壯而釋之公仰瞻天表知可乘勢樹立因進曰阿  
塔布實拉爾國堅盛非他國比攻之必難拔其主與臣  
善請往招之制可按兵馬魯察城公單騎趨其國諭以  
禍福遂舉國內附錄功擢領齊哩克昆既班師隸王實喇  
郎從戰必捷屢入奏稱旨歲丁巳割彰德路為王分地  
江南平益以寶慶路王邸在極西絕域遣使必慎擇其  
人以公偕魯思檐木子古里沙迪音入覲計事公夙慕中  
土因挈家行目疾留豐州至燕病卒時至元五年八月

二十三也享年一百一十七歲初公至和林元帥荀公奇之妻以女生二子長阿哈瑪特早卒次額森一女適瑪哈穆特荀氏繼沒皆藁殯都城西朝廷念其勞以阿薩爾為大名路稅課提領麥砧哈檐西域名族念公之賢贅額森其家生二子長溫都爾始三歲次克呼始三月喪母繼張氏二子訥古伯克呼提領以至元十四年十二月卒年四十有四藁殯大名溫都爾兄弟鞠於外家攻儒書既長益習禮訓謀於師友曰古之姓或官或封無常

也吾其從祖母之荀乎遂姓荀氏又曰我兄弟讀書學禮無名字其可名則不敢忘吾先而字則從華可也於是師友相與字溫都爾曰平叔克呼曰和叔平叔入京初補吏從儕類試藝官不示以目俾以意自書而觀其優劣焉平叔獨列法家結案字綱以對主者驚異由左司令史轉戶部令史宗正府史中書右司掾除前官遷大都路警巡院達魯噶齊階承務郎皇慶壬子十一月卒官選格分地監都縣聽自除拜西邸以和叔世隸其

卹擬寶慶路邵陽縣達嚕噶齊中書奏可官進義副尉  
移彰德路臨漳縣進保義校尉平叔之喪躬赴之瘞祖  
父母殯側酬其遺逋挈嫂姪婦養于家以其職廢弟訥  
古伯內黃稅使臨漳終更移安陽愛其山水思安其先  
卜地司空村有飄風旋塵為渦蕙馬首者七衆皆見之  
下馬默禱若吾祖考宜此地當止風即泯買而為兆域  
遷祖考妣考妣兄以泰定四年歲丁卯二月癸酉葬焉  
以公西來而為使也表之曰西使之阡嫂阿蘇蘇拉姪

安圖繼母張氏訥古伯相繼沒俱祔馬遷林州達嚕噶  
齊陞奉議大夫彰德路總管府達嚕噶齊兼本路諸軍  
鄂囉總管府達嚕噶齊管內勸農事丙子春早入境即  
雨和叔自謂偶然而民心用是悅其來也作洹水石橋  
修公廨傳舍百廢俱興娶古華氏子溫都爾女特爾格壻  
約爾珠善良敬戒家法秩然我元始征西北諸國而西域  
最先內附故其國人柄用尤多大賈擅水陸利天下名  
城巨邑必居其津要專其膏腴然而求其善變者則無

幾也居中土也服食中土也而惟其國俗是泥也和叔則曰予非敢變予俗而取擯於同類也其戾於道者變焉居是土也服食是土也是土之人與居也予非樂於異吾俗而求合於是也居是而有見也亦惟擇其是者而從焉自吾祖為使而入中國委骨於是若詩書禮樂吾其可不從乎俗之不同理之損異吾其可從乎於戲若和叔者孟子所謂善變者也其俗不銘而銘其先其俗墓近人而必遠五害此其變之小者也西使公自絕

域入中國有勞未食及荀夫人皆殯於燕提領則殯大名平叔又殯於燕南北契濶凡幾易年始合於一繼母嫂弟姪又相繼沒其入北域若生者之有家墓而有所歸也使為孫子弟非和叔則九殯四置幾何而不為不食之鬼哉世有忍同室為溝中瘠沒委之而顙曾不泚也故凡觀人之先不在子孫之富貴而在其賢不肖爾嘗聞西域人多壽考公度越上壽至燕年已若是其馳驅幾萬里矣計其宣力自壯至卒不衰也吁其亦異人

也哉銘曰

于闐之山美玉出焉雄鷲沈毅實生其間犀兵內牝巖  
邑外環而天命有歸則取於殘大人崩厥角小人食其  
簞有如此渡吾力可殫吾分不可千萬心一潰其倒如  
瀾惟義所在天誅為寬伏軾棹舌扶危作安唐睢九十  
惟古其難何百歲餘驅馳克艱施不究於才用不崇於  
官流澤逢涌有子有孫弗矜好爵詩書是敦仕能愛人  
家能裕昆是知親親仁政所原四世一兆宰木鬱然年



雖百千祠鄉之人孰不思而指曰此吾使君之祖西使之阡

故承直郎僉嶺南廣西道提刑按察司事葛公墓  
碑

昔江南平中土人南走若水趨下家而占籍者有之銜  
命仕者又倍蓰焉芬華因循忘棄鄉里至葬其親而不  
歸或志歸不力子孫單弱漸至迷委又不若遂葬之為  
愈也幸而歸葬漫不復省日就榛蕪雖愈於迷委而孝

子慈孫為不若是恕也家致千金身為達官有所不免  
况貧賤者乎惟篤於孝思的然有見者其庶幾乎進義  
校尉武昌路黃岡河泊提領葛君暨其弟永州路祁陽  
縣幕以至元四年戊寅歲奉其母完顏夫人之柩歸柩  
輝州孫村先塋至則累累不容復窆卜其南為新阡遷  
祖考按察公而下凡十三墳按察公勅誥俱逸訪親故  
間蓋家人質於汴且三十年倍酬而得之泣相謂曰吾  
先累世弗耀及大父起家亢宗所至有善政子孫宦學

不墜餘澤所被也新阡實祖我按察公而行者流離居  
者貧乏不表之阡是知有善而不傳且再易世將不可  
復考矣乃狀其行實求銘於予予嘉其志乃為銘之按  
察公諱榮世為淇上人曾大父大父罹金季亂皆能不  
去鄉里天兵之南也自奮出說郡守率郡人迎王師鄉  
里賴以生全者公之考諱旺者也元帥必拉罕命招納  
降附倡議置縣蘇門因署為令公任授衛輝二州提領  
譏察使改蘇門主簿蘇門改輝州復提領譏察使陞輝

州判官蘇門復縣仍主簿而兼尉焉中統初經理江南地居水陸之衝軍興駢沓儲備餉給吏之宿毒不能病民調衛州鎮撫軍民彈壓官兼錄事三年復輝州判詔課農桑時河北荐饑部使者頒區田法郡邑不敏於行檄公察覈躬率野人相宜授方熟得百倍土之境墾者教以糞薙隣境法焉勸農課最遷蘭陽縣令耕桑學校益著其績擢敦武校尉磁州判官雖居底僚下從而上信也州當孔道名遂藉甚轉平陸縣令兼諸軍鄂囉平

陸號難治至即繩豪右勵游惰崇儒修教敦本易末恤  
征人使居行無慮五事考備大盜黨五方橫求盜畏縮  
公攝尉以計擒之盡其黨擢承直郎僉嶺南廣西道提  
刑按察司事徭賊方熾有司並供億為繭絲求其弊而  
刮剔之墨吏有聞風而遁者俄卒於官得年五十有五  
娶謝繼朱陳耶律子男七人晟德承事郎岳鄂推茶提  
舉晟信累功至千戶晟美陰濟源王屋巡檢謝所出晟  
義淮安鷹坊打捕提領某某早卒朱所出晟智陳所出

也女一人適張氏孫男十二人曰平提領也曰順江西  
憲司書吏卒曰玄縣幕也晟德之子也曰友直以疾廢  
曰友諒將仕郎處州路縉雲縣主簿曰友聞黃州路蒙  
古字教授晟信之子也曰某某曰淑益晟美之子也曰  
國賓曰國瑞晟義之子也曰諾海晟智之子也女七人  
俱適令族曾孫男九人女十八人公之先鬱於李世至  
蘇門公崛起挈垂死之民而生之設施才具可驗也公  
蹈其躅致用兵荒之餘先之以耕桑申之以學校知所

本矣惜其服政方隆而厄於壽子若孫曾孫三十人有以知其後之必大也平也玄也家非千金也身非達官也篤於孝思的然有見可謂賢已後之子孫宜取法焉  
銘曰

天造未暢里將受兵有奮其傑挈之於生保我一鄉不  
騫不崩攝邑未施乃啟厥後細民奠居大盜獲醜爰酬  
其功擢之繩糾天胡不辰歸舟有柩舊封雖安新阡惟  
宗若尊若卑昭穆是從固以閭垣翳以栢松既表其世

亦章其庸子孫既多自南自北豈不同居勢不可一世  
或再易邈將不識興言及此淚出橫臆勢不可一理則  
可周百世繼體四方省丘自根求枝沂源及流視此珉  
石我銘不浮

元故中奉大夫江北淮東道肅政廉訪使胡公墓  
志銘

安陽胡公里人也始在京相從而不相知有壬擢第歸  
江南先太夫人語其狀後問之乃驚喜曰吾親亦令求



訪而不謂得於今也承乏左司員外郎公為右司都事  
為右司郎中公代為員外郎先太夫人祔安陽武官塋  
公亦居魏郡夫人憂倚廬相去二里許時相慰也公入  
朝居中臺有壬叅議中書省事俄為治書侍御史又同  
事焉未幾公以病歸除河南江北等處行中書省叅知  
政事不行改江北淮東道肅政廉訪使一至即歸有壬  
待罪中書者五年始得請至鄉里相見甚懽公嘗力疾  
為具方念秋益涼病日退當日相從遊而不意天之殲

我故人遂至於不起也孤敬伯泣而請曰先子德善匪公誰屬嗚呼契濶之久始得合并而遽銘其墓邪公諱彝字安常姓胡氏雪堊其自號也世居鄢陵貞佑之亂遷安陽遂占籍焉祖諱珍累贈嘉議大夫吏部尚書上輕車都尉追封魏郡侯祖妣祝氏累封魏郡夫人父諱景先累贈中奉大夫江淞等處行中書省叅知政事護軍追封魏郡公妣王氏追封魏郡夫人彝安陽孝明原二子長則公也夙稟穎悟起家鄉校官轉大都路儒學

錄中書參議器其才辟掾府中歷儀曹省府為中書右  
司掾除工部司程工部主事除河南行省員外郎省曹  
有小人欲以糧傾其僚公抗掇之力居多歲饑贊省臣  
擅發廩活飢者僉河西隴右道肅政廉訪司事行部涼  
州辯盜牛之寃而正賊吏之罪拜監察御史遷右司都  
事計事行在所張寔者陳言伏路左乘輿之馬為驚特  
誅之抗議得免上都獄有殺人之夫者賂西僧將用佛  
法曲赦之公力陳其非卒正其罪陞左司員外郎尋除

工部侍郎鄧州倉為水所汜作渠分其勢公所董萬人  
夜忽舉火譟潰同僚惶懼公但靜坐至旦繩其首衆復  
安役魏郡公訃至奔赴迄襄事羸毀骨立服除拜陝西  
諸道行御史臺治書侍御史太夫人迫之使行當闕中  
大饑之餘甫事經畫而太夫人訃至既葬遂廬墓側手  
樹松栢大作塋門甫大祥除江西湖廣道肅政廉訪使  
行改戶部尚書請使交至鄉里榮之戶部兩遇朝廷有  
大故頒諸王費鉅萬計公建議以鹽易銀賜用以足拜

治書侍御史陞御史既歸除河南不行至淮東即歸疾革盛服趺坐教弟子家人覩縵明盡請郡侯杜公弘道與之訣又作詩留別其友五人有壬其一也治命柩以論語殉勿斂華美勿用緇黃言畢而逝公生至元十八年辛巳十二月二十五日丙辰以後至元四年戊寅閏八月二十七日薨於正寢享年五十有八以是年十一月十二日壬申祔魏郡公塋娶楊氏封魏郡夫人一子敬伯也國子生補侍儀舍人一女適侯思禮平生刻意

字學憂樂不廢其薨也鄉人皆以為歷階二品年及六十身居鄉里弟若子皆在側以疾終於家在公為無憾予獨以為生之難成之難世既失才予復失友其能不為之痛哉銘曰

公昔入京蜚英妙年我從之游莫知其先尚論世契悔言之遲天復遂之聯班鳳池憂患歸來創鉅盡瘁一線洹水汨血相視臺閣路遠公間我來觴詠未竟松栢遽摧琅琅耳言巖巖耳存述美貴知子予所惇霜鵲騰秋

後邁無前人有菜色以腴以鮮小人犯蹕斧將及吭何  
以生之力陳其狂坐鎮衆喧力障狂流時名即我我豈  
名求分藩既重領憲亦劇匪病匪老敢忘帝力歸來里  
閑詩酒自娛誰謂一旦古今異途遺辭及予字仍飛動  
墓雖宿草哭猶為慟孝明之原祖考是從我銘不佞永

志幽宮

至正集卷五十三



欽定四庫全書

至正集卷五十四

元 許有壬 撰

碑志

故封從仕郎武昌路武昌縣尹萬君墓碣銘

愚昔在京聞咸寧萬君隆師教子季弟有孚就學其家  
辱視尤厚天厯戊辰識其子國鑒明年季冬娶於咸寧  
始識君而登其堂焉至元四年戊寅歲七月戊申君以

疾終於家己卯十一月庚申葬邑北雙鴻灘湖白塢諸  
子請銘其碣按宋有諱思杞者齊郡無棣人為江西提  
刑因占籍豐城君遠祖也至高祖炳游鄂愛淦川山水  
家焉曾祖諱必大妣范氏祖諱從龍妣劉氏考諱文舉  
妣宋氏君諱希孟字醇甫生七歲丁勝國訖錄從母逃  
難俘至沔州西邂逅世姻張叟說其將得贖歸則故基  
餘廩舉為豪據宋夫人攜君訴官僉省鹿泉賈公方事  
撫定檄主者皆復之長益刻勵奉母孝謹部使者將表

宅里固辭乃已表姊良人吳誣構下獄事急質田於君  
約三年贖事俄白即請贖君急歸之母黨曰濂者田將  
淪於質君曰可易契業不易創奈何棄之吾念世戚非  
利之也假緡出之歲入其租及其直即反之舅氏前進  
士楊溪先生掖君於立楊溪病以二子託既卒挈歸教  
育經理其家天厯己巳大旱有儲者皆閉閤以俟翔貴  
君發廩平其直出入郟斛不二民有李賈各棄田若山  
林易穀直有成約明年春直增倍差二子始來如元直

給之邑屢災後先三十餘戶戶賑穀一石所識窮乏者  
倍之居直火衝者再四隣煨燼而居獨巋然人謂陰德  
所致郭德方死無以斂遺之杉材其子伋酬直千緡君  
曰吾與爾父分雖舅甥義若兄弟忍利之邪監縣巴延  
坐誣就逮以屋居其孥巴延卒為具棺衾資其家使歸  
作德新堂儲書延蜀老儒王履佐才八年佐才捐館躬  
治含槨棺斂將擇地葬之其子欲葬鄂不能止乃厚賻  
之復求明師勉諸子終業且語之曰甲戌秋吾祖挈三

子十三孫避地舟居吾最孱弱後獨吾母三人歸不意  
有令爾曹一乃心力庶幾無忝枚舉其名因其才而教  
之後皆如其言用子國鎮官封從仕郎武昌路武昌縣  
尹既受命而終壽七十二娶孫氏先公三十三年卒子  
五人曰國鉦能世其業曰國鎮起家荆南宣聞知印湖  
廣省行人除黃州錄事曰國鑒中延佑庚申鄉貢進士  
舉曰國鉉曰國銓皆儒業女三人長適李得潮次適吳  
棨幼未字孫男六沫沂淵汶濂渭孫女四君莊慎有識度

楚俗鬼君獨不諂豪家子率汎習君獨教以詩書殖產  
雖豐而衣不兼采食不重味賑災惠乏乃復不靳其貲  
貳子遺脫身來歸舉已墜於陵谷變遷之餘既復其舊  
而又有加焉者其有以哉嘗患世人必官而行其志官  
固行志之具也不官他果無具乎力不能及人而不能  
行其志宜也力可及人也獨非行志之具乎惟能推吾  
之有餘以濟彼之不足其及人不博矣乎食人之祿而  
受其寄者有所不及也况從而賒之者乎君之榮於生

而昌於後宜也銘曰

仕食其職不職其憂受人牛羊芻牧盡求貪夫徇財死  
易一錢周室秦越人何望焉不官我身幸裕我藏忍乘  
爾危遂搯爾吭提攜偃僂形鵠色菜不易吾邨不力吾  
概災戶三千戶凡幾人露處嗷嗷而腹我困昔君之來  
踽踽其迹今君之老子孫蟄蟄有朱斯服由葉漑根何  
以致之經籍教敦雙鴻卜吉嗣承惟賢支百伊始其昌  
其延

故成全郎諸路醫學提舉部公墓志銘

公諱文忠字信鄉姓部氏世居河南業為醫金亂昆弟  
四人北渡河亂離自給其諱成者公之祖也占籍濟寧  
尋遷彰德因家焉妣闕氏考諱闕氏公幼讀書師  
紫山胡公以儒為醫故所造詣視世之專門而局於其  
術者有加焉擢大都路醫學教授恪盡其職太醫院知  
其賢不使出而浮沈郡邑也累陞成全郎諸路醫學提  
舉秩第五品太醫院總天下醫政而考覈課藝薦擇校



職提舉實握其要雍容其間以稱職聞致仕歸築別墅  
洹水之陽自號洹溪野夫日與老友詩酒相娛樂至元  
四年戊寅歲閏八月二十八日以疾卒於正寢享年七  
十有六配王氏子四人長曰元早卒次曰弘業儒出官  
除闕郎利用監知事次曰中曰恪皆為彰德路醫學

正女三人長適李

闕

次適王

闕

次適郭

闕

孫男三人女

一人俱幼以是年十一月

闕

日祔安陽清流源先塋弘

請志既按其狀叙其世若履歷矣他及知者湮沒可乎

公為人純和而舒徐與人交無少長皆得其懽心自其  
為醫官里之醫苟能效一藝隨其藝高下皆推轂使其  
不為齊民先公捐館京師歸葬之議未決公厲言主鄉  
里之議不敢忘也予得請歸蓋欲載酒相從而尼於塵  
事者數矣其生也不能盡平生之懽今沒矣可以泄吾  
悲者獨銘爾尚敢辭哉銘曰

粹其著懿厥稟引年歸曲肱枕土維稼洹可飲未予卑  
均五品七十六得已甚生治世卒正寢子服官迹方闕

慶源肆日已浸清流原澤不滲銘幽宮子予審

故嘉議大夫廣東道都轉運鹽使贈通議大夫戶  
部尚書上輕車都尉追封高昌郡侯哈喇布哈公

墓志銘

公諱哈喇布哈高昌人其先曰瞰欲谷者助討安祿山  
封忠武王數傳至克斯布呼公高祖也遼錫號阿達都  
督曾大父岳弼大父亞思弼世有奇勲皆國相父約羅  
特穆爾慷慨自植兄伯勒齊爾布哈柄用既隆殺西丹僧

稍監復有功左右忌而譖之不能自明乃同歸我朝太祖皇帝待以殊禮而留為質焉傳皇帝弟幹真以孝悌不殺統治中原從平河南監軍民總聽斷化行盜彌以壽卒官公幼奉母鄂通夫人居益都慨然趨父官所請學父奇其志授輝和爾儒書性警敏誦輒不忘李璫叛母夫人逝難相失公晝夜號泣從父行省薩奇蘇平賊購獲奉歸行省器之薦入宿衛使益都立四脚山冶以勞授金符都提舉尋讓厥弟天兵之南擢行都漕運使饋

輸以濟宋平上守成策大要存國體勵士節定官程厚  
民生昭舊族撫新民時論韙之江南漕秣米二十萬石  
由邗溝達河舟覆損十之一斛之出納復有大小之耗  
責償舟人公抗言多寡有量水覆非人沒責償非宜請  
獨當其責報罷時相憤嫉黜監寧海路遷江西宣慰使  
改廣東轉運鹽使兼領諸蕃市舶私販之徒連萬人作  
亂行省檄公暨招討使達實密捕之渠魁既殲親抵巢  
穴悉招出復業條鹽法不便革之劾按察托歡姦利罷

之盜歐南喜破城殺吏衆十萬公圖上阨塞并攻取策  
分兵搃之功最諸將占城之役護餉道遇賊歐鍾鋒甚  
銳公慨然曰軍餉重事退縮誤國可乎率先力戰矢竭  
馬創格鬪踣數十人氣益厲兵寡為所執賊欲奉為主  
公大罵之遂遇害至元甲申二月十九日也年三十九  
屢見神異越民繪像祠之某年月贈通議大夫戶部尚  
書上輕車都尉追封高昌郡侯配希台特勒氏賢操風  
著後三十五年壽七十二卒封高昌郡夫人二子長曰

# ד"ר. יגאל אלון

魯噶齊曰僕列簾至順庚午進士將仕郎湖廣行省管  
勾皆文質子曰善著泰定丁卯進士將仕郎淮安錄事  
司達魯噶齊越質倫之子也孫女四人曾孫男九人女  
六人公少有志節器可大受用兵理財纔一節爾而履  
閱所施人視為法至於見危授命則大節可知已延祐  
設科今六舉公六孫舉輒中一人唐宋盛時儒家世科  
未有如僕氏一門兄弟之盛天下傳為美談不知其先  
何修而得此於天也觀公之行則天道可知已然亦竊



訝天之屑屑然若有意於報公秩秩然猶舉器而列置  
於地者豈以科名之貴實出至公不於彼而一於此以  
必天下後世之信於為善邪抑公之忠義在天地間百  
世不泯精誠之至則與天一其必於天者自有在也於  
戲僕氏其益顯矣某年某月某日改葬公滕州禮教鄉  
清溝原使來請銘奇徹圖於有壬僕列簾於弟有孚皆  
同年義不敢讓為之銘曰

惟契輦水太古未漓其鍾為才天下之奇流祉在昔盛

迺卒今繫尚書公曰大是任純孝生知忠貞有自王師  
弔伐允資餉饋六合既一守成異宜大攄厥蘊以昌聖  
時督漕摧齮寸莛巨鐘民死而生民盜而農力戰無前  
蜂蟻敢兵沒當厲賊首離豈懲嗟嗟越民廟祀無斁匪  
公之異實公之德天之報公曰惟顯哉諸孫聯科鄧林  
取材東山卜吉土厚俗善帶以清溝猶昔闕  
啓時出其淵刺銘納幽何千百年

慶源再

故奉政大夫鉛山州知州兼勸農事元公墓志銘

高平元利甫始識於京實大德丁未春距今至元壬申  
凡十六年至治壬戌承乏南臺御史行部江西利甫為  
權茶判官泰定丁卯先公祔安陽先塋利甫先卜築吾  
鄉偕鄉人致賻惟謹今年鉛山代歸又及先太夫人祔  
既襄事六月二十九日拜賻於其居郡東北張見里潔  
衣肅迎喜動容體謂其居陋密邇右丞文肅韓公別業  
假屋延欸三起視其具平生歷履資格崇卑子壻性質  
外家隆替若耕織纖悉悉以相告予方撰屢利甫忽召

僮急求水飲已曰我胸中躁俄左臂足不隨但云頭痛者再僮欲扶歸已不能履若將奄奄者夫人子女皆城居予為之搗叱僕婢分走求醫來已不及矣以九月十八日葬張見西原其友封禮部員外郎杜愚狀其行挈其壻馬緒致夫人高平縣君韓氏之辭曰元門一旦至此所以圖不朽者其孤未有知未亡人是責沒雖不幸幸適有遇志其壙他復誰託予憂患中不輕出出際若是不少後先且告言覲縷若將有託焉者是亦果有不

偶然者乎按元氏世為澤州人祖諱寶妣齊氏考諱琇  
累官承務郎樞密院都事贈奉直大夫澤州知州妣姬  
氏追封高陽縣君五子曰闕大同路行用庫使曰闕龔  
寧路總管府判官曰享利甫也曰字沆州路總管府治  
中曰闕高平縣務使利甫幼侍親讀書京師通譯書國  
語補武備寺史除將仕郎武備寺承發架閣管勾歷壽  
武庫副使利器庫大使選補中書省史除中書省架閣  
庫管勾轉奉訓大夫武備寺經歷母憂服除起為彰德

路總管府判官京師歲所需物郡邑例買於民其直曠  
欠不給給則大半入貪吏手名為和而實白深懲其弊  
先付以直民甚德之橋道圯壞率皂隸應其役民輸粟  
倉吏扭歲弊取贏繩治如法橫費為省郡雖家居私謁  
杜絕分憲行郡或託士求舉叱之曰身苟不慎虛譽何  
益而憲推廉能乃為舉首秩滿有彰德等處鐵冶副提  
舉之命未赴改奉直大夫江西等處摧茶都轉運使司  
判官茶法病民郡邑尤窘釐不便者數條課亦告登舊

弊出額取分利錢官吏恬習謂當受猶俸祿然一切却  
之風紀舉堪守令遷奉政大夫鉛山州知州兼勸農事  
歲大饑出祿米五百斛倡大家賑之和者至萬石人詠  
歌不能忘間居樹藝方為歲晚計而溘爾長往可勝嘆  
哉得年六十有三夫人文肅女恭儉柔懿相家於成初  
文肅與澤州公同在樞幕愛其淳慎而女馬文肅老子  
幼果能相其營葬而經理其家二子長觀音努八歲幼  
甫兩月一女馬緒妻也噫人有死雖同而有不同者

或牀穿曠歲竟亦不免生者無悔逝者毒焉或遺世食  
頃生者不及進一劑之拯留恨無極逝者安焉是蓋得  
於天之不同而或者遂謂此愈於彼豈理也哉惟正命  
全歸聖人之所取其庶幾乎二氏為宏勝誕夸嘗預告  
人以聳動愚俗而靜修之士原始反終亦有前知而不  
亂者如利甫者其知乎方校資格有望將來其不知乎  
告言覩縷若將有託焉者何也豈動乎四體有不能自  
已者乎其知不知予不知也獨悲夫族屬至親無一在



側而予叫呼救療雖終無益而區區之心亦勞矣其偶  
然乎其亦彼有過乎如有所遇也則予之銘之也不容  
辭已銘曰

有齡匪鮮六十又三有官不卑守爵是儋為薪火傳則  
二斯男疾恒楚極逝乃笑談馮生芸芸及是斯可緒使  
狂奔躅石途左豈其自知告言瑣瑣猶針投芥銘實在  
我我銘孔昭宅幽諧卜利爾後人以似以續

至正集卷五十四

欽定四庫全書

至正集卷五十五

元許有壬撰

碑志

教諭王孝卿墓碣銘

武卿王誠從余游一日出行實致其兄進之語曰進兄弟不肖而得忝顏士類以自異於鄉民市商肆工者親之教也先人德善不可誣恐久遂泯重進不孝敢以為

請按王氏家沁州武鄉縣長樂里曰現當金末從軍有  
官勲子興參元帥杜公幕次曰信善治生家以不窶信  
娶元氏生忠字孝卿進父也孝卿早失父元氏誓志秉  
節督家人力田桑躬治絲枲平居毫釐不輕出至延師  
待賓則豁然不復靳儀範姻族孝卿性穎悟力學不倦  
土俗當冬隙羣居終夜斷麻取膚孝卿以膏火不繼焚  
麻取光且斷且誦自餘手不廢卷經史百家靡不研究  
下逮陰陽方技佛老之言亦致通焉事母盡子職族無

遠近歲時交歡物禮俱至隱居教授執業滿堂郡博士  
知其賢辟為邑教諭令邑民皆得矜式雖孝卿亦自喜  
將階是以發其光也大德辛丑元氏年六十七以病終  
孝卿克致其哀明年妻焦氏亦殞上無恃下無助又二  
年乃卒得歲四十有八葬西山先塋子三人進其長也  
初孝卿之喪母也葬祭一準文公禮不用浮屠不恤傍  
議進之喪父也恪遵遺訓有嚴無替治家儉勤遂致饒  
益視昔百倍立祠華不逾制而時祭盡禮曰德曰義皆

孝弟克家祭統謂銘者一稱而上下皆得焉進之知此學也力人可不知教其子乎是可銘也銘曰

王世右族翕闢替隆有居沁鄙樹德惟崇帝降而祥匪金匪珠俾生子為儒以華以腴翁也早殖但聞其嗶母也拮据竟玉于成嗚呼孝卿生得母以為賢子死有子以為賢父雖死猶生

蘄黃宣慰使魯公夫人田氏墓志銘

夫人姓田氏利路西和州長樂人故四川安撫使德實

季女正議大夫兵部尚書蘄黃等處宣慰使答德威妻  
田世右族曾高上俱以武功為宋顯官夫人及笄歸宣  
慰舅湖廣行省左丞治家嚴夫人相宣慰以能婦稱宣  
慰早卒子榮甫一歲不以煢煢子而專於慈推世賞與  
諸子俾為學以世其家治家以勤老而明健談往事歷  
歷可聽女紅一日不去手至順四年八月十四日卒于  
武昌之第享年九十有一女一人適趙植孫男二人先  
進先昇女二人先惠適鄭文監先熹未嫁以闕  
年闕

月缺日昃公安先塋文監致其外舅榮之狀請曰昏門  
欲傾而支絕而續者母也力痛念冲愚先子德善多逸  
吾母居孀五十年節義炳炳忍復湮沒幸哀而志其壙  
夫人女公卿家夫在而能婦夫沒而能母執德秉義天  
昌其壽子且五十而諸孫亦詵詵矣予因有以見為善  
之多獲也法三十前夫亡六十後不嫁表厥宅里脫不  
幸逾三十賢者固不敢誣凡庸之情念法已不與去耄  
尚遠遂分不齒予嘗竊慨與善之狹也然法不局則冒



有志於風教者亦究其本何如爾夫人守節五十年凜凜然在世者固不係乎表之有無也銘曰

有營之豐有殖之蕃嗟未亡人若可飫溫彼呱者孤不季不昆茫茫百年敢予固存慮勝而往校利有奔彼市道交天叙有惇天厚其報將百斯孫我銘其幽永示弗  
援

贈承務郎天臨路同知湘潭州事朱君墓碣銘

君諱士心字奎仲姓朱氏世為湘鄉人曾大父用舟大

父應龍宋進士父斌以子玉誠貴贈從仕郎潭州路安  
化縣尹配周氏贈宜人君生宋淳祐庚戌卒延祐己未  
至治辛酉十二月二十三日葬七都鹽井之原娶袁氏  
繼陶氏子合班秩承務郎武昌路蒲圻縣尹兼勸農事  
君贈承務郎天臨路同知湘潭州事袁氏贈恭人合班  
欲揭之阡屬銘惟慙嘉乃為親而筆之君為童不喜弄  
性恬淡諸弟絡繹入仕徙居湖山獨事樹藝事安化君  
不少違左右作童稚狀曲意承歡安化君年八十五卒

君六十七矣哀毀踰少壯友五弟怡怡分田取其磽噐  
取其敝壽七十子四孫二十二生為孝弟人沒追榮六  
品子曰璣曰琪曰瑾琪瑾出陶氏合班則璣瑾琪之兄  
袁氏出也通國語積勞譯掾為今官賢而能政者也予  
見大家類喜官而鮮克由其道惟貨是求得亦失之是  
猶作墉而不堅其址楨幹一釋仆不旋踵爾安化君父  
子積善于躬而合班投足正途不徑不竇以底于成蓋  
植於前而實於後也然予聞黃大史言吾儕衣冠而仕

豈已力哉皆自高曾以來積累偶然冲和之氣在此一枝耳嗚呼世之自以為能而秦越其族者亦回視其始之一本乎亦推其原之所發而偶然在我乎予竊有慨于世而重有望于合班者又將遠其澤于方至也銘曰人不愧天天不遠人彼難之獲惟致之馴熄而有光邈而益振賚恩螽涌由葉溉根不菑何畬不耕何獲吾菑吾耕匪今而昨天昌其門流慶未已椒蕃瓜繇子孫孫子鹽井之原鳳山直馬匪山而人後其勗旃

副使譚生甫墓碣銘

南陽書院山長廖則逢嘗徵寧鄉亟稱邑人譚生甫賢  
狀其行請曰世達官聞人則逢不及識而識者山林中  
人也子名喜善達官聞人豈得專子之銘敢致其子朝  
貴意徵銘其阡予憫其意遂從而叙之生甫名應發吏  
部端潔公後早事鉛槧作稅官不樂棄去為人踔絕好  
賓客娶易氏生男朝榮女懿真易氏卒葬萬善里荷暕  
塘生甫壽五十卒葬溫泉鄉景龍里朝榮懿真既婚嫁

相繼卒朝貴本李氏子朝榮未生生甫養為嗣泰定丙寅遷景龍之葬于烏江建廟立祠割田以奉祀事邑庠摧圮獨作禮殿學廩不充割膏腴百畝入之歲歉發廩捐直且飲食來者徙李氏塋佳地教其子姪晚乃舉四子此其狀大較也予聞楚俗鬼殫財土木事非其事名教所出職者且不知恤况非其職而傾財力任者乎寸土一木訟結累歲况百畝乎歲歉閉廩騰直乘時為富則損直而又飲食之不明乎義而能之乎可謂善變其

俗者已世有為此必聞諸官而表厥宅里朝貴則力拒之然而人之稱以義者不戒而一樂善之天人心之同然也使世有君子將出亦必不靳而與之此聖人與人為善之盛心也其後譚也勞筋力以立其家養生送死以答其德者固已無愧若夫泝其源沿其流則朝貴之義又有大於是者焉予銘生甫而詳朝貴者所以右譚也銘曰

應發名生甫字世寧鄉譚其氏貌督征屢俱弃櫝軼材

龔厥肆生丙辰卒乙巳鬱多美李乃嗣義之實善攸取  
細克充大斯舉江有沱沂洄室馴弗安汙則釋我為銘  
理不忒本支百視此石

故進義副尉元氏縣主簿馬君墓碣銘

君諱顯姓馬氏世為遼山人祖罹兵亂莫詳所出至旺  
娶李氏生君君少孤有志節形質魁碩不妄語笑見危  
難急如在己聖朝既平金平陽太原郡各一王遼山和  
順故隸平陽與太原接壤守臣主彼者率其徒劫二縣



民籍之民從違相半遂自為敵日千百鬪擊君甚不平  
謂衆曰聖天子既定封民各有屬此王之民而為彼戶  
可乎錄其版白諸府府畏忌不果行會滅薛二輩行斷  
事官往訴其狀尋奏復之因檄君為和順令至則興治  
補弊安輯流散民甚德之在官十年治最一路伊蘇巴  
哈王嗣封與語嘉之佩以銀符衣以錦襖一蹙紋繡靴  
一雙銀五十兩至元己巳調天下官君自以治蹟不下  
任其銓授除榆次主簿君受命曰令與簿雖有高下職

王事則一也欣然赴之秩滿陞進義副尉保德州判官  
民女有貧不克嫁者出俸資之戰骨蔽野為大塚收葬  
之移元氏主簿丙子歲五月十三日卒于官得年七十  
九皇慶癸丑始祔于四里堠塋娶趙氏子八人長同其  
母趙兵亂相失次天牧天翼天羽為儀曹掾卒天祥天  
佐天輔天祐皆謹愿克家女一人適周氏孫曾四十人  
於戲君逃亂子遺而能卓然有立歷官盡忠若子若孫  
蕃衍若是安知他日無挺挺高出其先者乎銘曰

位奚崇卑克稱斯榮事靡難易惟志竟成匹夫崛起而能回事之難者以為易處位之卑也而如崇是知非齊民之流名豈與死而相從伊農昏勞有秋其豐植本其茂支百是叢堅珉表阡遠君休於無窮

廣西憲史熊君墓碣銘

廣西憲史熊君諱文煥字用晦致和戊辰六月六日卒十一月二日祔江夏西興鄉長樂村先塋其弟文炤介湘陰通守納琳巴哈致其父克昭之辭曰我家三世業

儒祖澤是賴有子五人仲子文煥讀書入仕矣乃先我而逝我哀其慧而夭也思有以異衆人之漸盡泯滅者且昔嘗拜子金陵文而碣之則衰朽鞠子之哀得以自舒矣蓋予至治壬戌承乏御史而君為湖南奏差南臺控十道俾來絡繹一人接對能否立判時已多其敏捷而期其可遠也而止於斯也君先世居鄖曾祖諱天錫宋寶祐己未省試第一人祖諱季永咸淳丙寅補太學上舍始遷武昌克昭為歸州巴東教諭配劉氏君在昆

季間文采郁然積勞湖北憲及格為奏差尋遷湖南陞  
書吏遷廣西以疾歸遂不起年三十有五娶李氏一子  
慶孫選格出官多途拔清貴速化者科舉下即曰憲屬  
一為憲吏則迤邐至中書掾出身第六品其不至者班  
資雖卑亦變化易反手謂其風紀已試無施不可也然  
路貢儒吏府州拔胥吏百間一得又有操觚憲司服勤  
執役不知幾年始與班祿又不知幾年而為奏差而陞  
書吏得惟艱哉慮居久人狎則兩道易遷從使者繩糾

郡邑望風若畏死居下盛權故疾之者衆朝議屢變選  
補法至其權則勢不能輕之也但歲以御史覆其迹而  
去留之君廉介稱於人人不疾之御史不去之可謂適  
用之才已夫以適用之才服艱得之役當方剛之年有  
垂白之親而一旦天卒於庠天之在冥冥者果何如哉  
聞者哀之況識者乎識者哀之況父母兄弟妻子乎故  
系之銘曰

寒爾衣饑爾食罄爾愚克爾質爾祿我養我門爾高弗

養非高天乎劬勞豈爾愛親喜懼逾常而造于亡於虜  
百世而下曰此熊君之藏孰不爾傷

贈中憲大夫河東山西道宣慰副使紐公墓表

聖朝孝治天下錫有位以及其親是與人為善也人有  
殫刑不率而格於不僂之僂者蓋有以觸其為善之機  
焉至大中始行封贈推恩世數視職崇卑有司不謹三  
格始復皇上率舊諭飾周詳久可不弊幽而泉壤昭而  
家庭存沒均洽其或不慎則舉而委諸掌故之藏人非

喪心鮮不自勵勸懲之道於是兩盡余甫冠知河東紐  
君賢致和戊辰會于江夏則已休致矣一日謂曰克讓  
結髮筮仕卒勤四十年先人中憲公既疏縣封日愈恪  
慎懼或失墜今弛擔世途吾知免矣而先人又進郡封  
不表之阡則君親之德不才係守之難吾子孫藐乎其  
不知也子可無為我筆之夫自封典一行姦貪且為循  
廉矧素賢者其益進于忠益顯其親宜哉惟紐氏在後  
周有曰因者暨子士雄俱以孝稱他無見焉晉有鈕滔



吳興人豈紐轉為鈕若鞠之為麴乎紐今著郡吳興豈  
滔亦其先邪世遠譜亡莫詳所出有居汾州之孝義者  
族大以蕃至用始遷介休生中憲公諱文敦厚樂易教  
子以禮嘗曰吾無過人者循理安分使鄉閭稱善良差  
可無愧用是沒齒志願畢矣至元乙酉六月缺日卒於  
家享年五十九葬城西先塋克讓守龍陽贈奉議大夫  
冀寧路總管府治中驍騎尉追封介休縣子配王氏介  
休縣君克讓以中憲大夫湖南宣慰副使致仕加贈中

憲大夫河東山西道宣慰副使上騎都尉追封汾陽郡  
伯縣君進汾陽郡君三子長克忠李克恭克讓其次也  
為掾廉為理幕賑湖南饑活人多雪雷州李妙生三人  
寃賞一資岳武昌皆劇郡為推官用法平恕其去龍陽  
也州人紀之碑娶陳繼張封皆郡君嗟乎孝其親則思  
榮其親孝則在已榮則在君克讓兩及其親卒完晚節  
不孤聖朝與人為善之至意矣余故併叙其說俾後裔  
皆有感焉孫十人曰端者方世其祿銘曰

古士所事皆竭能致惟行之恒匪率亦至世不古趨率  
之始行昧厥宜有謂賢謂能伊率之久而格之多一機  
混融八荒太和彼紐有子在汾之許視誠歆然允示繩  
祖

至正集卷五十五

欽定四庫全書

至正集卷五十六

元 許有壬 撰

碑志

李氏新塋碣銘

李氏自宋瑩邢之堯山東侯里徙西侯里地復無隙泰  
定甲子其後曰之芳者即瑩東一里而別營兆域焉遷  
其祖考新其封樹蓋將倡百世而再始於斯也其友孔

君嘉甫以書致之芳語曰先世由宋歷金不去鄉土雖  
陵谷變遷譜次莫究而兩塋之內列封秩如樵牧無擾  
今隙不容竄義當改卜近而可究者自吾祖主簿始不  
有紀之後世子孫不知兩塋之纍纍者皆吾先也嘉甫  
故人也之芳子曰祚者昔嘗識之乃為之叙曰主簿諱  
進仕唐山縣三載恩信決人娶石氏復盡內助用大其  
家子天祿中統初勸農司檄為屬官督邢民之不昏作  
勞者職卑而能盡其事一子即之芳親志未終者舉為

之早以孝聞優游田里祚為太學生仕有日矣亦浩然  
歸養親治生雍雍如也噫人之生於世也時有否泰家  
有盛衰或斷嗣續或散四方世守邱壟王侯有所不獲  
聖人有不知其墓者況齊民乎李氏之塋滿近遷遷至  
再而不失其始可謂盛矣故系之云

李本實繁有植在邢不樛不翳支百其榮惟是深宮瑞  
慶攸并若泉盈科導之益清邇不紊叙遐不殊鄉松楸  
如雲鬱其相望嗟江之南忘親誅利遼或千里迷不再

世我我堯峯綿綿來裔視此歌詩有永無替

贈僉太常禮儀院事孟格圖公神道碑銘

河間總管萬嘉問貽書有壬曰先子太常公長千夫戍  
闔海而卒其不孝孤席世德致顯融既疏封矣辱知我  
深且樂銘人善者獨子爾道不孝焯世德者子忍我拒  
哉有壬固樂銘人善而非能辭者也夙交最歡而相期  
以遠獨吾二人則是銘宜我屬也乃序而銘之序曰太  
常公諱孟格圖蒙古之準台氏大父諱某國初以材武



扈戰隸右手萬戶駐廣平因家焉父諱呼遜驍勇善戰  
從討李璫身冒矢石俘七人詢知為所驅市人即釋歸  
使語其黨曰朝廷誅止首惡脅從罔治無淪胥以亡賊  
聞者多解體鄂渚襄樊之役皆著功從攻廣西創劇不  
能甲遣子庫克楚代行戰死靜江移師江右復遣其季  
黑山戰於洪又死焉平生百戰瘡殆被體而未嘗妄殺  
壽八十三而終以總管貴贈中順大夫同僉樞密院事  
上騎都尉追封范陽郡伯配欽察氏生庫克楚葉氏生

公及黑山皆追封范陽郡君公勇肖僉樞先登陷敵視死不讐為大帥阿珠公器重宋平以功授右衛親軍百戶達嚕噶齊階敦武校尉佩銀符多致數善營造方築都城穿漕渠指畫督役人與其能納延之叛扈戰有功陞福州親軍千戶達嚕噶齊階忠翊校尉佩金符戍興化軍民咸德之至大庚戌九月十二日卒於戍壽五十七明年二月葬廣平曲周縣闕之原贈武德將軍同知廣平路總管府事驍騎尉曲周縣子再贈中順大夫

同僉樞密院事輕車都尉范陽郡伯三贈亞中大夫僉  
太常禮儀院事上輕車都尉追封范陽郡侯配欽察氏  
追封范陽郡大夫人二子長總管也起家山北照磨遂  
讓世爵於弟歷御史西臺中臺僉副各道同僉中政院  
事戶部浙省正郎二茶漕入為戶部侍郎改內宰尋除  
今官皆嘉議大夫所至有稱次諾海襲世爵以薦陞江  
浙行省都鎮撫樞密斷事官今鎮江上萬戶達嚕噶齊  
階太中大夫孫男四人壽安永安定安寧安女六人托

克托鼎額蘇掄索諾木適國子生旺扎勒巴哈延福提舉邁  
古岱爾太祝王敏行觀音努潤努庫庫楞未行女弟元努  
適右衛千戶達魯噶齊佛努生子海直登延祐辛酉進  
士第公束髮行伍累積戰勞至荷符節顯其先而開厥  
後兄弟皆殉國子然養父竭力致樂在衛迎母就養以  
孝聞兄子閭馬女鍊木倫敦養而室家之雅尚儒術延  
名士以教其子故伯也才諳亢厥宗仲也以篤慎世  
其祿流慶所及甥海直亦以科第顯嗚呼士子一登仕

即捐其故習遑恤其後哉而教以鮮卑語事公卿為要道者在所不論也公出兜鍪而貽謀之方不以彼而以此其可訓也夫銘曰

天造朔易材武惟家及常厥邑遂移於華強力攫攘挹波蹄涔導源詩書猶海之深子其佔畢我則服弭嗟我不及盍及我子朱幡隼旗實為甸侯崇居不寧恪乃聿脩䟽封范陽報若合符匪曰我能乃慶之餘宜爾後昆世濟其德永言孝思視此銘刻

故資善大夫輔義公陳公神道碑銘

輔義公安南陳公薨五十年猶子正議大夫清化府路  
宣撫使德潤以公故漢陽城西馬湖地湫且隘購得善  
地於鳳棲山至元後戊寅十一月吉日遂更葬焉狀其  
行請曰先世父拔身安南竭誠內附世祖皇帝灼其忠  
蓋爵以上公優以祿賜圖報未究天嗇其壽而又無子  
也銘其善使有聞不在德潤乎請既切乃筆之曰安南  
昉見虞書漢唐皆郡邑之唐末為曲顓所據更數姓至

李傳世差久至龍翰不振為衆叛所圍出奔歸化江外  
戚陳勝與從弟審起鄉兵平亂龍翰復國勝以功官太  
尉審封快路侯龍翰卒子昊昂嗣以女昭聖妻勝子日  
照昊昂卒昭聖嗣位踰年遜位於其夫陳氏遂有國追  
號勝為大祖審為安國王審子肅敬為武道王武道娶  
程氏生三子長即公也諱秀煖其國封文義侯世皇既  
平雲南大帥烏蘭哈達統師出邕桂道安南境將會大  
兵於鄂日照懼更名光晒納款於我光晒卒子曰烜不

請自立召入覲以疾辭再召始遣從叔遺愛代朝制封  
遺愛安南國王命莊椿帥師送就國日烜不奉詔廢遺  
愛為庶人朝廷有事占城假道安南諭使給餼又不聽  
鎮南王以大軍壓境日烜守要害拒戰屢敗之王渡江  
受俘於其宮公昆弟請於武道曰聖元龍興萬國臣妾  
我家昧畏天之義抗拒王師與其覆宗社而糜爛其民  
孰若轉禍為福抱祭器以存先祀乎武道從之遂降進  
李女於王後生宗王日烜弟益稷亦率其屬降公奉父



母北遷次邕州武道卒公從益稷入見封益稷為安南  
國王封公輔義公官資善大夫佩金虎符其屬授擢有  
差後復有事安南賜公弓矢從鎮南王還其國公以疾  
留來賓我師破羅城日烜遁王以暑潦班師公從歸子  
嘉議大夫義安府路宣撫使德漸卒於全州詔公居漢  
陽至元二十四年五月以疾卒享年闕娶田氏弟二  
人大獻其國封明誠侯娶黎氏生德潤嶠封明智侯皆  
先卒余聞昔人言交州多南金象犀其產皆奇怪而草

木亦殊異疑陽德之炳耀獨發於是物而罕鍾乎人公  
生絕傲嗜學不減華人有萃山吟藁辭多悲壯豈非鍾  
陽德之炳耀者耶不獨詩也君子所以異於人者以其  
知天命而識時務也昔呂嘉相越逆命路博德率師進  
討身與越俱亡公所得視嘉不既多矣乎然自出疆族  
黨凋落親殯未啟嗣子弗天故見於詩者其鳴不能不  
悲也苟有繼其志而述其事者其悲可以已矣德潤痛  
世父之無後而懼其無聞也卜厝有地顯揚有石植祠

墓側省拜以時可謂猶子矣銘曰

南交毓材有離其倫天誘其衷入為我臣何遠弗柔點  
蒼既勒光炳効順有章其節爰及子烜乃敢不庭帝赫  
斯怒我師有征公其懿親謀也能淑匪亢厥宗實舉其  
覆帝曰咨汝汝公汝王居之漢濱以烝以嘗嗟嗟輔義  
甚禮而文踰越萬里流離一身胡導其來不昌其年孰  
啓孰完猶子有賢滔滔江漢鬱鬱松柏鳳棲之原永奠

幽宅

司獄杜君墓志銘

先公在鄉校時獲拜緱山杜先生手錄其詩挾之游江南有壬總角嘗受讀焉承乏參議中書先生曾孫秉彝實掾東曹先生薨有壬歸鄉里始納交秉彝父愚情誼尤篤至正壬午九月丙戌秉彝弟秉鈞卒於京師秉彝哭之幾絕哭已請曰吾弟公契家子也歸葬有日非公之銘則何以釋吾父之哀而灼吾弟之善乎有壬知其世為詳交其父又久且深其誼宜銘秉鈞字德維安陽

人曾大父諱瑛贈翰林學士追封魏郡公謚文獻緱山  
先生也大父諱處愿東昌路推官父愚以子貴封亞中  
大夫彰德路總管京兆郡侯母曹氏京兆郡夫人為人  
和易與物無競世賞歷監當陞九品流官除彰德路司  
獄以明恕聞春官辟為掾疾弗克赴命再下驛次涿州  
疾抵京謂其兄曰吾忍死見兄若可無恨然負吾翁矣  
醫療百至竟弗起得年四十二配林氏生子伴叔年十  
五卒繼師氏生女亦早卒第四人秉直秉容秉一秉德

嗚呼父母俱存兄弟無故一樂也父貴而壽康兄兩拜  
御史四僉司憲今中書左司都事為時聞人而君發軔  
駁歷駁駁繼踵矣孰謂天之可必者竟不可必耶壽夭  
命也仁者必有後理也今乃若是耶余之銘灼君之善  
矣其能已兄之慟乎兄之慟已矣其能已翁之慟乎若  
夫君之善灼矣則翁之慟可以已矣於是乎銘銘曰  
有材斯萌將以為棟楹植而樞楹哉而傾曷慰其翁曷  
寧其兄太空冥冥吾不得而名吾以為為杜氏子銘

故朝請大夫山南湖北道提刑按察副使梁公神

道碑銘

黃嚴知州梁廷奉其祖考山南湖北道提刑按察副使  
公行實請曰先祖學積於躬孝聞於鄉忠著於官葬歷  
三紀而墓碑未刻敢告有壬辱與公同里閑聞長老稱  
公甚習竊有慕焉凡鄉先生一言一行固當搜攬掇拾  
為淑人計况銘公乎廷之請其敢辭公諱貞字幹臣彰  
德安陽人曾祖考諱立妣張氏祖諱湊妣石氏考諱璧

善居貨客有持金鍍銀貿物者直以為銀斷視之乃金也追而歸之其信義類此少力學值金末弗克卒業而里行家法鄉閭是則嘗戒諸子曰學所以為人子為人臣也我生不辰有志不就汝輩能繼我志非特為孝子將不為忠臣乎公倡諸弟篤勵進修中統庚申大名宣撫使司推擇為左司知管明年轉中書左三部提控令史聞父疾六日馳千二百里至家已弗及毀瘠廬墓部符三至督起力請終制知不可奪乃檄郡加優典以勵



風俗服闋授濟源縣尹始入境從者求田婦所負水飲  
馬婦難之公詰其故婦對地素艱水公曰吾無擾於民  
而馬先飲其水其可乃縱馬聽其所之馬前蹴地以待  
因識之既視事鑿其地得泉甘冽民為立祠號梁公井  
境有濟瀆祠謁禱絡繹民罷於奔公毅然曰禱神而擾  
人奚福之有悉拒絕之貢尚醞米故事二政部輸郡以  
付公民勸公辦公曰就可福民何為而辭他邑以逋耗  
重責於民公獨挈羸以歸趙成訴虎食其牛乞蠲徭役

公戚然曰令不善之所致也償其價未幾虎斃於叢祠  
敦本抑末禁姦戢暴力田務蠶條以諭之勸善懲惡箴  
以勉之立鄉校設師弟子員集孝弟節義等事使讀者  
有所興起三年間笞罰止二十七人蝗被河朔獨不入  
境歎周隣郡邑乃告豐文正許公兩薦公於朝時廷議  
治最者二人郡則衛輝陳侯縣則公也未終以疾去邑  
人思而紀之碑至元戊辰始立御史臺上御廣寒殿召  
拜監察御史官承事郎遇事輒言不事苛察不畏強禦

凡建明平反彈擊皆犁然有當於人心者八年陞承務郎遙授中山府判官行河南等路行尚書省都事時有事襄樊贊謨給饟公力居多十一年授承直郎代州知州為治一視濟源而節目加詳司徒五教周禮六德六行之訓與夫先正格言家喻而戶曉之勸農以豐衣食之本牧犧羊以助徭役之需引潯沱而硲瘠之地以饒正昏禮而論財之俗以革禁火葬而送終之禮以厚部使者薦剡沓上聲譽大振十四年擢奉議大夫江北淮


東道提刑按副使行省有戾於法者未踰月而三劾之  
同列懷懼公處之裕如也十八年三月移山南湖北道  
階朝請大夫至是凡六轉官三以母老辭不允躬請行  
臺始克歸養二十二年太夫人史氏八十卒公既免喪  
遂不出大德十一年九月六日終於正寢年七十有九  
十一月日祔郭村先塋弟桂楫梗樞配張氏先卒子男  
一莊女一適蓋某孫男二長達早世次遷也女三曾孫  
男女若干有壬述公之行因有以見中統至元之治焉

治不在法而在於人官不在地而在於行臺之始立慎簡  
至矣一令之賢廷見擢授非以素歷風紀而取也及其  
見諸事業猶輕車之就熟路何哉用得其人而人有其  
蓄隨其地措之爾公為御史治效已著乃出為行省底  
僚又三年始守一州又三年乃有淮東按察副使之命  
未聞以久居朝廷為榮而亦未聞以風紀復官有司為  
辱也選格之通融士風之渾厚於此可見矣自今視昔  
豈不大枘鑿乎有壬傷今而思昔而又有疑於昔焉盛

時多才固不乏用公喪母時年甫五十有七至其終也  
家居凡二十三年獨非遺賢乎使盡其用姑以休致為  
期則十餘年中其所施設不有倍蓰於已試六轉者乎  
然則廉頑敦薄於風俗蓋有補焉漏盡夜行亦有所警  
矣高風勁節豈但儀範鄉里而已哉諸孫詵詵而遷方  
出守名郡慶源日浚矣銘曰

相有孝子出為忠臣官而蹇蹇家而恂恂彼有捧檄匪  
親而躬聞呼走承強有弗從板蕩餘民禮義何居火親

財婚田荒畜墮陳條具約三申五令爰格其心是曰予政  
九重面擢豸冠斯莪我行無事不暴不苛水能潤物豈  
局故地導之而行何往不利於邑於州或省或憲安其  
所遇有蘊隨見惟是寸草欲報春暉爾不我從我惟有  
歸昔翁不及母豈容再怡愉考終生死禮備人生此世  
此外何物悠悠素心皎皎空谷侯樵侯漁雍容二紀世  
豈忘公天實成美我思君子志一時殊勗哉後昆世德  
其符



至正集卷五十六